

DIDZA' ZÍ'ALÖ GUSÖL-LË'Ë PABLO QUEËBI' BI'I TIMOTEO

Pablo rugapë' Dios bi'i Timoteo

1 ¹ Neda', Pablo, naca' gubáz nasól-lë'ë Jesucristo. Caní naca' tu' caní gunná bë'ë Dios, Nu rusölá rë'u, enca' tu' gunná bë'ë caní Xanru' Jesucristo, Nu na' runru' löza. ² Rugapa' Dios li', bócha'ado' Timoteo. Nacu' ca zxí'ini caza' tu' benru' tsözxón xichinë' Dios. Rinábida'-në' Xúziru' Dios, enca' Xanru' Jesucristo uzá' ládxë'ë quiu', en huéchi' ládxë'ë li', en gunë' ga soa dxi icja ládxi'do'o.

Pablo rusé'ë ládxi'bi' Timoteo ca naca xibá cabí naca idú

³ Ráta'yua' lo' na'a gunu' ca na' gúta'yua' lo' cate' ni' guyija' luyú Macedonia, para ugá'anu' lu yödzö Éfeso, en inná bé'enu' bal-lë' bönni' ni' cabí ulu'sédinë' tu xibá yúbölö, ⁴ en cabí ilunë' zxön yugu' didza' ridasö, en lágaca ziántërö cö' xuz xtó'ogaca bönachi, yugu' le tun ga tuí'i ládxi'gaca bönachi le nácagaca nítisö. Yugu' le caní biti' tun tsutsu bönachi queë' Dios ca naca le ta'yéajlë' Lë'.

⁵ Le ré'ëni gun lë ni rea' li', naca para ila'dxí'i bönachi luzé'eguequi, naca idú ládxi'gaca, en gaca dxi'a le ta'zá' ládxi'gaca, en gaca idú le ta'yéajlë' Dios. ⁶ Ca nácagaca lë ni, biti' bulu'ruajë' bal-lë' bönni' dxi'a, pero gula'guélë'ë tu nöza yúbölö, en tunë' bal yugu' le biti' nácaté.

⁷ Té'ënnë' ulu'sédinë' bönachi ca naca le rinná bë' xibá queë' Dios, sal-la' biti' ta'yéajni'inë' lë na' tu'sédinë', en biti' ta'yéajni'inë' le ta'nné' nácaté.

⁸ Rë'u nóziru' naca dxi'a xibá gunná bë'ë Dios, channö nu rugún le dxin ca ral-la' gun. ⁹ Lë ni nóziru': Dios gudixjë' xibá queë', calëga para inná be'e bönachi tsahui', pero para inná be'e bönachi caní:

Nupa ta'dá'baga' le rinná bë' xibá na'.

Nupa biti' túngaca ca rinná bë' xibá na'.

Nupa tu'cá'ana Dios cá'asö.

Nupa tun le naca xihui'.

Nupa biti' túngaca Dios zxön.

Nupa tu'cá'ana le nequi queë' Dios cá'asö.

Nupa tuti xuz xiná'aguequi.

Nupa tuti bönachi.

¹⁰ Nupa tun le ruá' dö'.

Yugu' bönni' nacuá'lenë' la' löjödxi bönni'gaquië'.

Nupa ta'bán yugu' bí'ido'.

Nupa ta'zí' yë'.

Nupa tun tsutsu xtídza'guequi, ta'nná le cabí nácaté.

Nupa ta'dá'baga yugu' xibá tsahui'.

¹¹ Nôziru' naca caní tu' bidxín queéru' didza' dxi'a buzá' ládxë'ë Dios queéru'. Lë' náquië' lá'ayi, en budödë' lu na'a didza' dxi'a na' runa' libán que.

Pablo rë' Cristo: "Xclenu'" tu' buéchi' ládxë'ë lë'

¹² Rea'-në' Xanru' Jesucristo, Nu rutipa ládxa'a, "Xclenu'" tu' buzxöni ládxë'ë neda', en buzóë' neda' guna' xichinë'. ¹³ Caní benë' sal-la' zí'alö neda' gunné' zi'a queë', en gudxía ládxa'a bönachi queë', en zían le bi'a dö' quéguequi, pero Cristo buéchi' ládxë'ë neda', tu' bena' caní lu yöl-la' biti' réajni'i quia' cate' ni' biti' réajlë'ënida' Lë'. ¹⁴ Na'a, zxöntërö naca le buzá' ládxë'ë quia' Xanru' Jesucristo, lë na' run ga réajlë'ëru' Lë', enca' ga nadxí'iru'-në'.

¹⁵ Didza' idútë li lë ni, en le naca lesaca' ila'zí' lu ná'agaca yúgu'të bönachi, le rnna: Lë cazë' Jesucristo bidë' yödzölió ni para busölë' bönachi dul-la', ate' busölë' neda' sal-la' nácara' bönni' dul-la' ca yúgu'të bönachi. ¹⁶ Que lë ni na' buéchi' ládxë'ë neda', ate' bulu'e lahui Jesucristo ni'a quia' neda', bönni' dul-la', ca naca yöl-la' zxön ladxi' idú queë', para gaca' tu le ruluí'i lógaca nupa ila'yéajlë' Lë', en gata' quéguequi yöl-la' na'bán idú. ¹⁷ Na'a rnní'a: iYöl-la' ba Dios, Nu rinná bé'tica'sö, Nu catu caz údxi que, en Nu biti' gaca ilé'ëru', la's dui Dios Nu nözi caz yúgu'të! iQueë' Lë' gácatuca'sö yöl-la' run bal, en yöl-la' ba, na'a dza, en yúgu'të dza zá'gaca! iCa' gaca!

¹⁸ Zxí'ina'do' Timoteo, rudöda' lu no'o xibá ni para gunu' xichinë' Dios ca runë' tu bönni' idú ládxë'ë rejë' gudil-la, en para uzi'u xibé yugu' le gula'guíxjö' zí'alö nupa ni' guluí'i didza' uláz queë' Dios ca gaca quiu'. ¹⁹ Len yöl-la' réajlë' quiu' Cristo ral-la' gunu' caní, naca idú dxi'a icja ládxi'do'o. Chigula'chixi gula'nigui bal-la bönachi, nupa bulu'zóa tsölá'alö le réajlë'ëru' Cristo. ²⁰ Caní gulunë' Himeneo, en Alejandro, nupa na' busana' lu na' Satanás tu' xihui' para ila'zëdë' ca ral-la' ilunë', para cabirö ila'nnë' zi'ë que le nequi queë' Dios.

Le rusedi rë'u ulídzaru'-në' Dios

2 ¹ Que lë ni na' le naca lo le richízia' icja náagagaca bönachi naca ca ral-la' ulídzaru'-në' Dios, en ca ral-la' gáta'yuru' lahuë', en ca ral-la' inábiru'-në' gunné' bi riquíniru', en ca ral-la' guiéru'-në': "Xclenu'." Yugu' lë ni ral-la' gunru' uláz quéguequi yúgu'të bönachi. ² Lësca' caní ral-la' gunru' uláz quégaca nupa ta'nná bë', en quégaca yúgu'të nupa náagagaca lo. Caní ral-la' gunru' para gaca dxi'a queéru', en gata' queéru' yöl-la' riböza tsáhui'do'. Ral-la' gunru' caní lu yöl-la' réajlë' queéru' Dios, en lu yöl-la' ba'a ladxi' queéru'. ³ Lë ni naca dxi'a, en le raza ládxë'ë Dios, Nu rusölá rë'u. ⁴ Dios caz ré'ënë' ulu'lágaca yúgu'të bönachi, en ré'ënë' ilúnbë'e le naca idútë li. ⁵ Tuzë' náquië' Dios, en

tuzè' bönni' ruúnè' dzaga Dios, en bönachi. Nu ni naca Jesucristo, Nu gulaj bönachi. ⁶ Lè cazè' budödi cuinë' lu yöl-la' guti, le benè' tu' nözi dul-la' nabága'gaca yúgu'tè bönachi. Dios benè' ba nalí queè' cate' bidxín dza queè' gútiè'. ⁷ Ca naca lè ni, Dios buzóè' neda' para guna' libán que, en gaca' gubáz nasól-lè'è Cristo, para usédigacada' bönachi izá'a ca naca le réajlè'èru' Cristo, en ca naca le naca idútè li. Rilítèda', en biti' ca' rizi' yè'a.

⁸ Na'a, ré'ènda' ulu'lidzè' bönni' Dios, en iláta'yuè' lahuè' gáti'tès, nácagaquiè' idú dxi'a, en cabí ila'lenè' luzá'agaquiè', en cabí ila'dil-la dídza'gaquiè'. ⁹ Lësca' caní, ré'ènda' iláunu nigula le naca ba'a. Le naca lachi le ral-la' ulu'luí'inu lahui naca yöl-la' nöxaj ladxi', en le naca idú ladxi', en calëga le tu'pá'asinu icja lógacanu len oro, en yugu' bugá, en lari' nazáca'da'. ¹⁰ Yugu' le dxi'a tunnu ulu'luí'i lahui le nácagacanu ca na' run le táunu le naca ba'a. Caní ral-la' ilunnu nigula núnbè'gacanu Dios. ¹¹ Ral-la' ila'cuá'anu yugu' nigula dxisö cate' nu rusedi légacanu, en ila'cuá'anu nöxaj. ¹² Biti' runna' yugu' nigula lataj ulu'sédinu, en calëga ila'nná bé'enu yugu' bönni'. Ral-la' ila'cuá'anu dxisö ga nudúbigaca bönachi queè' Cristo. ¹³ Caní ral-la' gaca, tu' buzóè' Dios zí'alö Adán, ate' gudödi na' buzóè'-nu Eva. ¹⁴ Adán na', biti' guxzí' ye'e tu' xihui' lè', pero nigula queè', guxzí' ye'e lènu. Caní guca, gudítsjanu xibá queè' Dios, ¹⁵ pero ulanu nu nigula ruzóanu-bi' bí'ido' channö gúntica'sinu ca röjlóz le réajlè'èru' Dios, en yöl-la' nadxí'i, en channö gácanu idú dxi'a, en idú ladxi'.

Ca ral-la' ilácagaquiè' bönni' tapa chi'è bönachi queè' Cristo

3 ¹ Didza' idútè li lè ni rnna: Channö ruí'i ládxe'è nu bönni' gáquiè' nu gapa chi'i bönachi queè' Cristo, dxin dxi'a rizé ládxe'è. ² Nu bönni' rapa chi'è bönachi queè' Cristo run bayudxi gáquiè':

Tu bönni' cuntú nu gaca bi inné queè'.

Zoa túzinu nigula queè'.

Ral-la' gáquiè' ban ladxi', en idú ladxi', en nöxaj ladxi'.

Ral-la' gu'è ga ila'cu'è bóchi'ru' ta'dxinè' lidxè'.

Ral-la' gáquiè' bönni' nazéqui'de'enè' usédinè' bönachi.

³ Biti' gáquiè' bönni' re'jè', en calëga bönni' sínia'.

Biti' gaquiè' bönni' rizé ládxi'sè' si'è dumí.

Ral-la' gáquiè' bönni' dxi'i ladxi', en zxön ladxi'.

Biti' gáquiè' bönni' ruhuídi'nè'.

⁴ Ral-la' gáquiè' bönni' rinná bé'enè' dxi'a bönachi nacué' lidxè'.

Ral-la' ilunbi' zxí'inè' ca rnna xtídzè'è lu yöl-la' run bal xúzgacabi'.

⁵ ¿Naru' huácatsö tu bönni' gapa chi'è bönachi queè' Dios channö cabí raca inná bé'enè' dxi'a bönachi nacué' lidxè'? ⁶ Biti' ral-la' gáquiè' tu bönni' si' gusí lahuè' tè'è Cristo, para cabí tödi bè' gun ba zxön cuinë', en biti' gaca queè' ca na' guca que tu' xihui', nu ben ba zxön cuini, ate'

Dios guchúguië' que tsöjgá'ana lataj chul-la. ⁷ Lësca' ral-la' gáquië' bönni' ta'nná dxi'a queë' nupa cabí nabábagaca bönachi queë' Cristo, para cabí soa nu uzóa lë' tsölá'alö, en para cabí idzunë' lu yalaj que tu' xihui'.

Ca ral-la' iláquië' bönni' tácalenë' bönachi queë' Cristo

⁸ Lësca' caní ral-la' iláquië' bönni' tácalenë' bönachi queë' Cristo:

Ral-la' iláquië' bönni' idú ládxi'gaquië'.

Biti' iláquië' bönni' tu'rixë' didza'.

Biti' iláquië' bönni' té'ajë'.

Biti' iláquië' bönni' ta'zë ládxi'së' dumí.

⁹ Ral-la' gaca ilapa chi'ë idútë le réajlë'ëru' Cristo.

Ral-la' ilaca idú dxi'a icja ládxi'do'gaquië'.

¹⁰ Yugu' bönni' ni ral-la' si' bë'ëli' légaquië' zí'alö, ate' ní'irö gata' lu ná'agaquië' ilácalenë' bönachi queë' Cristo, channö cabí zoa nu gaca bi innë' quégaquië'. ¹¹ Lësca' caní, nigula que queégaquië' ral-la' ila'cuá'anu idú ládxi'gacanu, en cabí ilácanu unnë' que luzé'e. Ral-la' ilácanu zxön ladxí', en ilácanu li ladxí' lu yúgu'të le tunnu. ¹² Yugu' bönni' ilácalenë' bönachi queë' Cristo ral-la' soa túzinu nigula que queégaquië'. Lësca' ral-la' ila'nná bé'enë' dxi'a zxí'inigaquië', enca' bönachi ulidxi que queégaquië'. ¹³ Run bayudxi gaca caní, tu' ta'déli'në' lataj ga ilún bal bönachi xtídza'gaquië', channö tunë' dxi'a dxin tunë' tácalenë' bönachi queë' Cristo, ate' ilácarë' rugu ladxí' para ilu'ë didza' ca naca le réajlë'ëru' Jesucristo.

Le bigachi' que le reaj ládxi'ru'-në' Dios

¹⁴ Yugu' didza' ni ruzúaja' quiu' lu guichi, sal-la' runa' löza uduyútea' li'. ¹⁵ Channö huadzéda', ruzúaja' quiu' didza' ni para inózinu' naca ral-la' gunu' lógaca bönachi nacuá' lidxë' Dios, nupa nábagaca bönachi queë' Dios ban, en nábagaca tsutsu, en ta'guíxjö' dxi'a le naca idútë li. Nábagaca ca yugu' ya'zxón, en le nunída'gaca zö'ö, le nábagaca tsutsu, en ta'zón yu'u. ¹⁶ Le nácatë, zxöntëro naca le bigachi' que le reaj ládxi'ru'-në' Dios, ca na' nazúaj lu guichi le rnna:

Dios buluí'i lahuë', gúquië' bönachi.

Guca bë' náquië' tsahui' tu' guzóalenë' Dios Bö' Lá'ayi Lë'.

Gulácalenë' gubáz lá'ayi queë' Dios Lë'.

Guca libán queë' lógaca bönachi izá'a.

Gula'yéajlë' bönachi yödzölió Lë'.

Dios buchisë' Lë' xitsá' ga nayépisëtërë'.

Nupa ulu'huóaj ládxi'gaca ca naca le réajlë'ëru'-në' Cristo

4 ¹ Yálajdo' riguíxjö'ë Dios Bö' Lá'ayi, rnnë': Dza tsöjsëtëgaca, ila'dá'baga' bal-la bönachi Cristo. Ulu'huóaj ládxi'gaquië' ca naca

le réajlë'ëru' Cristo. Ulu'zé nágagaquië' xtídza'gaca bönachi nacuá'len bö' ta'zí' yè' léguequi, ate' ulu'zé nágagaquië' yugu' xibá quéguequi bö' xihui'. ² Ulu'zé nágagaquië' xtídza'gaca bönachi tu'luí'isö tsahui' cuínguequi. Yugu' bönachi na' tuí'i didza' le cabí nácatë, en chinazidi ládxi'do'guequi, para cabí uxösa léguequi. ³ Caní naca, tu'záguë'ë xinó'zguequi nupa té'ëni ulu'tsaga ná'agaca, en ta'nná bé'enë' bönachi para cabí ilágugaca le nagu'ë Dios para uzi'iru' xibé, lë na' huáca ilágugaca nupa ta'yéajlë' Dios, nupa na' chinúnbë'gaca le naca idútë li, en të' Dios: “Xclenu” cate' tahuë' le. ⁴ Dxi'a naca yúgu'të le benë' Dios, en biti' bi ral-la' uzóaru' tsölá'alö channö ráguru' le, en rëru'-në' Dios: “Xclenu’.” ⁵ Rusedi xtídzë'ë Dios rë'u, Lë' únë' dxi'a yúgu'të le gáguru' channö ulídzaru'-në' Dios, en inábiru'-në' gun lá'ayë' lë na' gáguru'.

Ca rurúajë' dxi'a huen dxin queë' Jesucristo

⁶ Channö usédinu' yugu' böchi' luzá'aru' yugu' didza' ni, urúaju' dxi'a, en gacu' huen dxin dxi'a queë' Jesucristo, en gaca bë' nazédu' dxi'a ca naca didza' que le réajlë'ëru'-në' Cristo, en ca naca xibá dxi'a rapa chi'u. ⁷ Gurú'una yugu' didza' ridasö que yödzölió ca naca didza' tuí'inu yugu' nigula gula. Béntica'sö le gun ga gacu' tsutsu para gunu' ca ré'ënë' Dios. ⁸ Láti'do'os uzi'u xibé gunu' le gun ga gácarö nál-la ni'a no'o, pero idú uzi'u xibé gunu' ca ré'ënë' Dios. Cate' runru' caní, lë ni run ga runru' löza sóaru' ibanru' yödzölió ni, enca' sóaru' ibanru' dza zá'gaca, tödi uzá'aru' yödzölió ni. ⁹ Didza' idútë li lë ni, en le naca lesaca' ila'zí' lu ná'agaca yúgu'të bönachi. ¹⁰ Que lë ni na', rusáca'da' zi' cuinru' runru' dxin, tu' runru' löza Dios ban. Cristo gútië' para usölé' yúgu'të bönachi. Tu'zí' xibé le benë' nupa na' ta'yéajlë' Lë'.

¹¹ Gunná be'e, en busedi bönachi ilún yugu' lë ni. ¹² Cuntu nu ral-la' uzóa li' tsölá'alö tu' nacu' bi'i ra'bán, pero ral-la' gunu' le uluí'i nupa ta'yéajlë' Dios ral-la' ilún ca runu' li'. Caní uluí'inu' légaquië':

Len didza' ru'u, en len le runu'.

Ca nadxí'inu' luzó'o, en ca ru'u lataj zóalenë' Dios Bö' Lá'ayi li'.

Ca runu' ca rnno', en ca nacu' idú tsahui'.

¹³ Tsanni za'a idxina' quiu', bé'tica'sö ladxi' ulabu' guichi lá'ayi lógaca bönachi nacuá' ga ni' zu'. Guchiza icja nágagaquië' lë ni, en busedi légaquië'. ¹⁴ Biti' udödu' cá'asö le buzá' ládxë'ë Dios quiu', lë na' bennë' quiu' ca na' gula'nná nupa ni' guluí'i didza' uláz queë' Dios, cate' ni' bönni' gula tapa chi'ë bönachi queë' Cristo gula'xóa ná'agaquië' li', en bulu'lidzë' Dios.

¹⁵ Béntica'sö yugu' lë ni. Bé'tica'sö ládxu'u gunu' caní, para ila'lé'e yúgu'të bönachi ca na' zeaj ridéli'nu' le nequi queë' Cristo. ¹⁶ Gudapa chi'i cuinu', en gudapa chi'i xibá rusédiru'. Béntica'sö yugu' lë ni, ate' channö gunu' caní, uló' li', en ulu'lágaca ca' nupa ila'yöni li'.

Ca ral-la' gunbi' Timoteo ni'a quégaca bönachi queë' Cristo

5 ¹ Biti' uzenu' bach yugu' bönni' gula, pero guchiza icja nágagaquië' didza', tsca nácagaquië' xuz cazu'.

Guchiza icja nágagacabi' bi'i bönni' ra'bán didza', tsca nácagacabi' bi'i böchi' cazu'.

² Guchiza icja nágagacanu nigula gula didza', tsca nácagacanu xiná' cazu'.

Guchiza icja nágagacabi' bi'i nigula ra'bán didza', tsca nácagacabi' bi'i zan cazu', ca na' röjlóz le naca idú dxi'a.

³ Ben bal yugu' nigula ba guti bönni' que queégacanu, nácagacanu túzinu. ⁴ Channö zóanu tu nigula caní nacué'abi' bi'i queénu o zxí'ini xi'sóanu, ral-la' ila'zédabi' ilunbi' ca ré'ënë' Dios, para ilácalenbi' zí'alö bönachi nacué'á lídxigacabi', en ulu'bí'ibi' quégaquië' xuz xiná'agacabi'. Lë ni naca dxi'a, en le raza ládxë'ë Dios. ⁵ Na'a, nigula na' nagá'ananu túzinu, runnu löza Dios, ate' rëla, en te dza rinábatca'sinu lahuë' Dios, en rulídzanu Lë' ni'a quégaca bönachi queë', ⁶ pero nigula túzinu na' runnu ca naca le rizé ládxi'nu nácanu ca tu nigula chinátinu cate' ni zóanu nabannu. ⁷ Lësca' caní, gunná be'e bönachi nacué' ga ni' zu', para ilún ca sa'yéaj yugu' lë ni, para ilaca bönachi cuntu nu gaca bi inné quéguequi. ⁸ Channö zoa nu bönni' cabí rugahuë' yugu' di'a dza queë', en le nácarö lo, channö cabí rugahuë' bönachi nacué'á lidxë', chigudá'baguë' le réajlë'ëru' Cristo, en nácarë' xihui' ca nu cabí réajlë' Dios.

⁹ Túzinu nigula zoanu túzinu caní chiyú'urönu ca tsónnalalaj iz huáca ibábanu nupa gácalenli', channö cabí bucá'ananu-në' bönni' queénu para sóalennu-në' ia'túë' bönni'. ¹⁰ Run bayudxi soa nu gun ba nalí queénu ca nácagaca le dxi'a runnu.

Gácalenli'-nu channö buscúlunu-bi' yugu' bí'ido',
en channö ruí'inu ga ila'cuá' bóchi'ru' zá'gaquië' yödzö zi'tu',
en channö ruí'inu le ilë'aj ilágugaca bönachi queë' Dios,
en channö rácalennu nupa ta'guí'i ta'zaca',
en channö rúntica'sinu yúgu'të le naca dxi'a.

¹¹ Yugu' nigula túzinu biti' yuí'igacanu tsónnalalaj iz, biti' ibábagacanu nupa gácalenli', tu' ilunnu ca ta'zësö ládxi'gacanu, en ila'dá'baga'nu Cristo, en ilé'ëninu ulu'tsaga ná'agacanu leyúbölö. ¹² Caní gaca, ila'bága'nu dul-la' tu' tu'zóanu tsölá'alö le gula'yéajlë'ënu Cristo zí'alö. ¹³ Lësca' ilácanu nigula xöhuëdi, en nigula ta'dasö ca', en calégasö ilácanu xöhuëdi, pero lësca' ilácanu nigula unné que luzé'e, en tsöjgútsa'gacanu ga yúbölö, en ila'nnanu le cabí nácatë. ¹⁴ Que lë ni na', ré'ënda' ulu'tsaga ná'gacanu leyúbölö nigula túzinu cani yú'ugacanu iz cuidi', en ulu'scúlanu-bi' yugu' bí'ido', en ila'nná bé'enu bi'i nacué'abi' yu'u que queégacanu, para cabí iluí'inu nu ridá'baga' rë'u lataj bi inné

queéru', rē'u na' réajlë'ëru' Cristo. ¹⁵ Caní ral-la' gaca, tu' chibulu'bíga'nu bál-lagacacnu, ate' tunnu ca ré'ëni Satanás tu' xihui'.

¹⁶ Channö núti'tës bönni' o nigula nu réajlë' Cristo, nacuá'anu nigula túzinu lídxigaca nupa na', ral-la' ilácalen légacanu, para cabí ulu'saca' zi' bönachi queë' Cristo. Caní gaca, bönachi queë' Cristo na' gaca ilácalen yugu' nigula nagá'anagacanu túzinu.

¹⁷ Benrö bal yugu' bönni' gula tapa chi'ë bönachi queë' Cristo, yugu' bönni' na' ta'nná bē'ë dxi'a, en bēntērō ca' bal yugu' bönni' gula na' tunē' dxin, tunē' libán, en tu'sédinē' bönachi. ¹⁸ Nazúaj lu guichi lá'ayi le rnna: "Biti' cu'u du ruá'aba' bēdxi na' rulíbiba' zxoá' xtila." Rnna ca': "Náquië' lesaca' nu bönni' huen dxin si'ë lazxjē'."

¹⁹ Biti' si' lu no'o didza' ruí'i nu ruzegui didza' tu bönni' gula rapa chi'ë bönachi queë' Cristo, channö cabí nacuá' chopá tsonna nupa tun ba nalí que le benē'. ²⁰ Nupa túntica'sö dul-la', busidxi léguequi lógaca yúgu'të bönachi queë' Cristo para iladxi ia'zícá'rö bönachi ni' Dios.

²¹ Ni'a queë' Xanru' Dios, en Xanru' Jesucristo, en ni'a quégaquië' gubáz lá'ayi rö queë', rinná bé'eda' li' gunu' ca ta'nná didza' ni. Tuz ca ral-la' uchi'a usöróu' yúgu'të bönachi, en biti' gunu' bal tuzē' bönni'. ²² Cuntu nu bönni' ixóatē no'o, cabí gunu' ga gáquië' huen dxin queë' Cristo, para cabí ibágu'u le runē' channö gunē' bönni' na' dul-la'.

²³ Bítirö guí'ju' nísasö. Tu' rúntica'sö bayá' lē'u ral-la' guí'ju' láti'do' xisi uva nal-la para cō' dxi'a lē'u.

²⁴ Yugu' dul-la' quéguequi bal-la bönachi ila'lá' lahui zí'alö cate' si' ila'dxín ga uchi'a usörōë' Dios léguequi, ate' tödi ni' ila'lá' lahui dul-la' nabága'gaca ia'zícá'rö bönachi. ²⁵ Lësca' caní, ila'lá' lahui dxin dxi'a núngaca bönachi, ate' channö cabí nalá'gaca lahui, cuntu nu bönni' gaca ucáchē'ë tsaz dxin na' nunē'.

6 ¹ Yúgu'të bönni' nadó'ogaca ral-la' ilúndē'ë bal xángaqüië', para cabí gaca nu inné' zi' que La lá'ayi queë' Dios, en que xibá queë'. ² Nupa ni' nacu'ë xángaca ta'yéajlë'ë Cristo, biti' ral-la' ulu'cá'ana cá'asö légaquië' tu' nácagaquië' bóchi'guequi. Ral-la' ilunrö dxi'a xichíngaquië' tu' ta'yéajlë'ë Cristo, bönni' ni' tu'zi'ë xibé dxin dxi'a na', tu' nadxí'inē' Lē cazē' légaquië'. Ca naca lē ni, busēdi bönachi nacuá' ni', en guchiza le icja nágagaquië'.

Le reaj lādxi'ru'-nē' Dios le ruzí'iru' xibé

³ Channö zoa nu bönni' rusédinē' xibá yúbölö, en biti' rusédinē' yugu' didza' dxi'a queë' Xanru' Jesucristo, ca naca xibá na' rusedi rē'u ca ral-la' gunru' ca ré'ënē' Dios, ⁴ bönni' ni' run ba zxön cuinē', en biti' bi nózinē'. Didza' biti' naca dxi'a rizé lādxē'ë ca nácagaca didza' böniga, en didza' bizxaj, yugu' le tun ga tu'zxé'e bönachi luzé'eguequi, en ta'díl-lalen luzé'eguequi didza'. Lësca' tun didza' caní ga ta'nné' zi' bönachi que luzé'eguequi, en ta'zá' lādxi'gaca que luzé'eguequi le cabí nácate'.

⁵ Lësca' caní tun ga ta'díl-latica'së' didza' bönni' biti' ta'yéajni'inë', nupa biti' nazí' lu nê'eguequi le naca idútë li. Téquini huáca ila'zí' dumí zían channö ilúngaca tsözxón nupa ta'yéaj ládxi'gaca Dios. Gucuíta ga nacuá' bönachi caní. ⁶ Zxön naca le ruzí'iru' xibé cate' len yöl-la' riböza zxön ladxi' reaj ládxi'ru'-në' Dios. ⁷ Biti' bi nuá'aru' cate' ridxinru' yödzölió, en lësca' caní, biti' bi uá'aru' cate' uzá'aru' yödzölió ni. ⁸ Que lë ni na', channö dësö queéru' le gáguru', en le gácuru', ral-la' udzéjaru'. ⁹ Yugu' bönni' té'ennë' gata' quégaquië' yöl-la' tsahui', gaca quégaquië' le si' bë' légaquië' le xihui', ate' ila'yu'ë lu yalaj que tu' xihui', ate' lu yöl-la' biti' bi nözi quégaquië' zían le ila'zé ládxi'gaquië', le ilún ditaj légaquië'. Yugu' lë ni ulu'suniti légaquië', en ilún ga ila'nítië' tsaz. ¹⁰ Tu' ta'zé ládxi'gaca bönachi dumí, lë ni run ga tun yúgu'të le cabí naca tsahui'. Bal-lë' bönni', tu' ta'zé ládxi'gaquië' le, bulu'cá'anë' le gula'yéajlë'ë Cristo, en chiraca quégaquië' zían le tu'saca' zi' légaquië'.

Nu run dxin queë' Cristo naca ca tu bönni' rejë' gudil-la

¹¹ Na'a, bönni' queë' Dios, gucuíta ga raca le caní.

Bé'tica'sö ládxu'u gunu' le naca tsahui', en le ré'ënë' Dios.

Guyéajlë'tica'së' Cristo, en bidxí'i yugu' luzó'o.

Bë' ladxi' gacu' zxön ladxi', en nöxaj ladxi'.

¹² Ca runë' tu bönni' idú ládxë'ë rejë' gudil-la,

ben dxin que le réajlë'ëru' Cristo, ate' beni quiu' yöl-la' na'bán idú.

Para gaca caní bulidzë' Dios li'. Dxi'a guca le gunnó' yalaj lulu ca réajlë'u Cristo, lë na' gunnó' lógaca zían nupa tun ba nalí que didza' bë'u. ^{13,14} Ni'a queë' Xanru' Dios, Nu na' nabánigaca yúgu'të le nacuá', enca' ni'a queë' Jesucristo, Nu ben ba nalí le naca dxi'a le gunné' yálajdo' lahuë' Poncio Pilato, rinná bé'eda' li' gun chi'u yugu' lë na' gunná bé'enë' Cristo rë'u. Ral-la' gacu' idú tsahui', en biti' bi gunu' le güí'i lataj nu bi innë' quiu', ga idxintë dza ni' ulu'í'i lahuë' Xanru' Jesucristo. ¹⁵ Cate' idxín dza na' huödë' Jesús, Dios ulu'ë lahui Lë'.

iDios náquië' lá'ayi!

iTuzë' Lë' dë lu në'ë yöl-la' unná bë',

en rinná bé'enë' yúgu'të nupa ta'nná bë',

en náquië' ca' Xángaca yúgu'të nupa nácagaca xan!

¹⁶ iTuzë' Lë' zóatica'së'!

iZoë' lu bení' ga biti' gaca nu idxín rácasö que!

iCatu caz nu bilé'e Lë', en biti' gaca nu ilé'e Lë'!

iQueë' Lë' gácatica'sö le run Lë' bal, en yöl-la' unná bë'!

iCa' gaca!

¹⁷ Gunná be'e yugu' bönni' dë quégaquië' yöl-la' tsahui' dza ni zóaru' na'a, para cabí ilún ba zxön cúngaquië', en para cabí ulu'zxöni ládxi'gaquië' yöl-la' tsahui' na' biti' naca löza. iRal-la' ilunë' löza Dios ban, Nu rúnnada' queéru' yúgu'të le ruzí'iru' xibé! ¹⁸ Gunná be'e

légaquië' ilunë' le naca dxi'a, para ila'yanda' dxin dxi'a tunë', lë na' naca tu yöl-la' tsahui' idú. Ral-la' bi ulu'nödzjë' quégaca bönachi yechi', en iluí'i ládxi'gaquië' léguequi. ¹⁹ Channö ilunë' caní, ulu'tubë' yöl-la' tsahui' na' naca idú, le ulu'zi'ë xibé dza si' za', en ila'déli'në' yöl-la' na'bán idú.

Le gulu'ë Pablo lu ná'abi' bi'i Timoteo

²⁰ Bócha'ado' Timoteo, ben chi'i le nadödi lu no'o. Gucuíta ga nacué' nupa tuí'i didza' cá'asö, en yugu' didza' biti' nazaca', en yugu' didza' bizxaj, yugu' didza' na' tuí'i nupa ta'nnasö tácada', ate' nazí' yé'eguequi ca naca lë na' tun. ²¹ Bal-la bönachi gula'zí' lu nē'eguequi yugu' didza' caní, ate' gula'chixi gula'nigui ca naca le réajlë'ëru' Cristo.

Rinábida'-në' Dios uzá' ládxe'ë quiu' le nácagaca dxi'a queë'.

iCa' gaca!